

## Revizaun Orsamentu Retifikativu 2015 husi Perspektiva Jéneru

Iha loron 25 Marsu 2015, Parlamentu Nasional adopta ona Programa VI Governu Konstitusionál hafoin debate konstrutivu entre VI Governu no Deputadu sira. Iha debate realsa katak Programa VI Governu ne'e kontinuaun ba politika, planu no programa sira V Governu nian, tuir Planu Estratéjiku Dezenvolvimentu 2011-2030. Maske tinan rua tempu limitadu, vizaun ba implementasaun ne'e ba tempu naruk. Vizaun dezenvolvimentu haré ba unidade nasional, soberania no dezenvolvimentu inkluzivu i sustentável, ne'ebe presiza partisipasaun ema tomak, laos deit engloba nesiedade no preokupasaun, maibé mos aspirasaun Timor Oan sira nian, liu-liu sira ne'ebé sei moris iha mukit nia laran.

Orsamentu ratifikativu 2015 hatudu VI Governu nia kompromisu ba kualidade aas, no haburas ekonomia sustentável, hamenus kiak, no prestasaun servisu efetivu. Atu atinji objetivu ne'e, harii ona administrasaun kiik, efisiente no efikáz liu atu:

- 1) Hadia formulasaun no implementasaun politika iha governu tomak nia laran liu husi estabesimentu Ministériu Koordenador tolu: Asuntu Sosiál, Asuntu Ekonomia no Asuntu Administrasaun;
- 2) Haforsa planeamentu ba tempu naruk prazu liu husi kriaun Ministériu Planeamentu no Investimentu Estratéjiku; no
- 3) Hamenus gastu no aumenta efisiénsia administrasaun liu husi hamenus numeru Administrasaun Estadu mai husi 55 ba 38.

Orsamentu Retifikativu 2015 nafatin ho montante \$1.57 billaun. Governu kontinua adota estratéjia investimentu makás, nune'e atu hahú haburas ekonomia no hamenus TL nia dependénsia ba minarai. Ida ne'e rekere Governu dada husi Fundu Minarai liu-fali Estimativa Rendimentu Sustentável (ESI), tokon \$689.0 hodi kobre investimentu.<sup>1</sup> Reseita husi minarai hahú menus husi 2012 tanba hatún produsaun i, iha 2014, tanba folin mina tu'un. Iha indikasaun katak folin mina sei tu'un lalais liu-tan iha tempu oin mai, tamba posu mina besik uzadu hotu ona. VI Governu nia foku mak diversifika ekonomia, halo mudansa prudenti husi dependénsia ba minarai, planeamentu investimentu ba tempu naruk, hamenus desperdísiu, no mos hadia efisiénsia administrasaun ba prestasaun servisu.

### Mudansa Xave iha Orsamentu Retifikativu 2015:

Maske iha Orsamentu Retifikativu 2015 laiha mudansa en jerál, iha duni mudansa ba alokasaun orsamentu hodi tane Administrasaun foun:

- Osan total \$47,540 muda tiha ona ba iha Remodelasaun Administrasaun.
- Ministériu foun, Ministériu Planeamentu no Investimentu Estratéjiku nia alokasaun tokon \$67.5, inklui Ajénsia Dezenvolvimentu Nasional, Aprovizionamentu, Mega Projetu, PNDS, Integrasaun Rejionál i, Planeamentu Urbanu.
- Orsamentu PNDS nian hetan mudansa boot liu, ho redusaun montante \$17.8, maibé ARAEOA no ZEESM nia orsamentu hasa'e ona tokon \$11.5.
- Kriaun Ministériu rua, Ministériu Interior i Ministériu Defesa, iha orsamentu kombinadu tokon \$70.8.
- Infrastrutura kobre tokon \$526.4 (Fundu Infrastrutura + Orsamentu Ministériu), la inklui fundu sira iha liña ministériu sira nia okos.

<sup>1</sup> ESI hatu 3% husi rikusoin mina nian. Ba 2015 estimasaun montante ida ne'e ba tokon \$638.5. Ida ne'e mak estimasaun husi motante ne'ebe sei fó sustentabilidade ba Fundu Minarai no garante montante hanesan ba jersaun sira iha tempu oin mai.

Ministériu lima (5) ne'ebe ho orsamentu bo'ot liu mak: Ministériu Sosial Solidariedade (13%), Ministériu Obras Públikas, Transporte no Komunikaun (10%), Ministériu Edukasaun (7%), Ministériu Estadu ba Presidénsia Konsellu Ministru sira (6%) no Ministériu Planeamentu no Investimentu Estratéjiku (4%); no mos Rejiaun Administrasaun Espesial Oecusse-Ambeno (6%). Hare tabela iha kraik ne'e.

**Ministeriu lima ne'ebe orsamentu aas liu**

	<b>2015 Livru Orsamentu 1 (\$ tokon)</b>	<b>Rektifikativu 2015 (\$ tokon)</b>	<b>% o Orsamentu Estadu</b>
Ministériu Sosial Solidariedade	197,004	196,593	13%
Ministériu Obras Públikas, Transporte no Komunikaun	160,530*	159,171	10%
Ministériu Edukasaun	103,842	103,011	7%
Ministériu de Estadu ba Presidénsia Konsellu Ministru sira	86,710	97,692	6%
COM-ZEESM	81,930	93,430	6%
Ministériu Planeamentu no Investimentu Estratéjiku		67,519	4%

Primeiru Ministru iha nia diskursu ba Parlamentu wainhira apresenta Programa VI Governu reafirma Governu nia kompromisu ba Igualdade Jéneru. Nia hateten, “**Aprosimasaun Integradu Jéneru** realidade ona iha Timor-Leste.”<sup>2</sup> Timor-Leste hala'o susesu ne'ebe importante iha integrasaun jéneru iha setór xave sira liu husi servisu mákina feto nian, Sekretariadu ba Apoiu no Promosaun Sósio-Ekonomiku Feto (SEM) ho servisu inter-ministerial nia Grupu Traballu Jéneru. Ministériu Finansa, hasai Sirkular kona ba Orsamentu 2015, iha ne'ebé ezije integra igualdade jéneru iha Planu Asaun Anual no Orsamentu sira. Ida ne'e hatudu rezultadu diak-tebes – ne'ebé dois-tersu husi Liña Ministériu no Institusaun Estadu sira nian hodi inklui provizaun igualdade jéneru iha sira nia Planu Asaun Anual. Maske nune'e, sei iha lakuna iha implementasaun ne'ebé presiza rekursu finanseiru adekua: Xefi Suku feto foin 2%, feto sira vítima violénsia 38% kedas (DHS 2009), tradisaun se'es feto husi nain ba rai, 13% deit mak feto sira nain ba negósio (CGA 2013), 69% feto sira iha servisu ne'ebé vulnerável kompara ho 47% mane sira (esbosu LFS 2013). Programa VI Governu Konstitusional tau kompromisu bo'ot liu ba igualdade jéneru. Liu tan abordajen integradu jeneru atu hamate violénsia bazeia ba jéneru, ne'ebe hatama tiha ona iha Programa V Governu Konstitusional, sira sei halo advokasia, koordena no monitora servisu konaba hakbit feto nia ekonomia no partisipasaun polítika, no mos implementasaun kompromisu nasional ba igualdade jéneru. Maske nune'e, orsamentu SEM nafatin tokon \$2.3 i orsamentu total SEM nian reprezenta deit 0.15% husi proposta Orsamentu Estadu.

- **Tan sa mak la hamenus orsamentu korespondente ho VI Governu nia estrutura mihis?**
- **Oinsa justifika aumentu alokasaun orsamentu tokon \$25? Maske proporsaun husi orsamentu adisional ida ne'e ho rasionalizasaun strutura VI Governu Konstitusional hodi halo koordinasaun ne'ebe di'ak liu, favor klarifika medida sira seluk iha aliñamentu ho VI Governu Konstitusional nia prioridade ba hadia prestasaun servisu? Alokasaun orsamentu hira atu hadia prestasaun servisu di'ak liu ba feto sira nia presiza, i.e. identifika feto nia nesiedade espesifiku, nia kondisaun oin-seluk, no adota sistema prestasaun servisu tuir didia'k?**
- **Osan hira mak Programa VI Governu Konstitusional aloka ba implementasaun kompromisu makaas ba igualdade jéneru?**

<sup>2</sup> Programa Governo Konstitusional ba dalima, art. 2.4.2, 2012-2017

- Iha VI Governu Konstitusional, se mak sei hala’o funsaun kontrolu ba aprosimasaun integradu-jéneru iha setor hotu-hotu hodi asegura katak politika, planu, programa sira i alokasaun orsamentu korespondente no adekuadu?
- Seguransa no infrastrutura hanesan setor rua ne’ebe mak bai-bain feto sira nia partisipasaun menus liu. Sira nia orsamentu kombinadu kobre 38% husi orsamentu total. Oinsa setor sira ne’e foti aprosimasaun integradu-jéneru hodi asegura feto no mane bele iha benefísiu hanesan, iha área rua ne’e?

### Setor Sosial

Institusaun Estadu	Esbosu Orsamentu Retifikativu 2015 (\$ tokon)	% husi Orsamentu Estadu
Ministériu Koordinator ba Asuntu Sosial	1,942	0.12%
Ministériu Sosial Solidaridade	196,593	12.52%
Ministériu Edukasaun	103,011	6.56%
Ministériu Saude	65,558	4.18%
Sekretariadu Estadu Juventude no Disportu	8,661	0.55%
Sekretariadu Estadu Promosaun Igualdade Jéneru - SEM	2,302	0.15%
UNTL	11,200	0,7%
<b>Total</b>	<b>398,266</b>	<b>25.38%</b>
Inklui Fundu Infrastrutura no Fundu Kapital Umanu	430,067	27.39%

Ministériu sira iha Pilar Asuntu Sosial nia okos, simu 25% husi Orsamentu Total 2015; ne’e hatudu kompromisu governu ba setor sosial. Alokasaun ba Ministériu Sosial, liu orsamentu total nia sorin-balun, no barak liu ba eskema asisténsia sosial. Gastus ba asisténsia sosial sei nafatin 11% husi total gastus orsamentu.<sup>3</sup> Barak liu (74%) aloka ba veteranu sira nia benefísiu pesoal \$129,447,000. Iha 2013 benefisiáriu feto sira besik 26%.<sup>4</sup> Restante husi orsamentu ne’e, sei aloka ba terseira idade sira, no pensaun ba ema sira ho difisiénsia i, Bolsa de Mãe.

Foin lalais ne’e estudu ida hatudu katak sistema asisténsia sosial la eficiente to’o uma kain sira ne’ebe kiak liu, tamba lubun boot husi fundu hirak ne’e la fahe tuir kritériu kiak nian.<sup>5</sup> Bolsa da Mãe deit mak asisténsia sosial ida ne’ebé tuir kritériu lolós no benefisiáriu barak liu mak feto, xefe familia (90%). Orsamentu ba Bolsa de Mãe aumenta bei-beik iha tinan hirak ne’e no bele to’o iha uma kain barak liu tan. Iha 2014 orsamentu tokon \$9 to’o uma kain 55,488<sup>6</sup> kompara ho uma kain 15,100 iha 2012. Iha dezafiu barak hodi asesu ba dadus ne’ebe lolos konaba benefisiáriu sira no liu-liu dadu dezagregadu sexu, klase, fatin jeográfiku, no ema sira ho defisiénsia.

- **Mekanizmu saida mak tau iha fatin hodi buka tuir pagamentu ne’ebe to’o duni iha benefisiáriu sira i prevene osan boros? Iha medidas ruma hodi fó sai dadu sira ne’e ba públiku?**
- **Mekanizmu saida mak tau iha fatin hodi buka tuir asisténsia sosial aloka ba feto sira no kategoria feto i.e. feto kiak, feto sira ho difisiénsia, feto sobrevivente violénsia, no feto xefe familia?**

<sup>3</sup> Tokon \$175.4 ba Transferensia publiku sei aloka ba Ministeriu Sosial Solidaridade ba programa sosial.

<sup>4</sup> Asian Development Bank, *Timor-Leste, 2013 Country Gender Assessment*.

<sup>5</sup> World Bank, 2013, *Timor-Leste Social Assistance Public Expenditure and Programme Performance Report*, Washington, DC.

<sup>6</sup> Ministerio da Solidariedade Social, *Relatoriu Implementasaun Planu Asaun Annual Direcção Nacional De Reinserção Social*.

Primeiru Ministru no VI Governu Konstitusional mos sei tuir Politika Zero Toleránsia ba Violénsia kontra Feto no Labarik Feto sira. Ida ne'e presiza aprosimasaun koordinasaun multi-sektoral, ne'ebe planeadu no identifikadu ona liu husi Planu Asaun Nasional ba Violénsia Bazeia ba Jéneru ho rekursu finanseiru no humanu korespondente i adekuaudu. 38% feto mak hetan violénsia fízika no violénsia sexual husi tinan 15.<sup>7</sup> Sira ne'e 24% deit mak buka asisténsia, 4% deit mak ba ható keixa ba polísia.<sup>8</sup> Unidade Pesoal Vulnerável (VPU) nia dadus hatudu katak númeru husi kazu sira ne'ebé mak ható ba sira, tún ona husi 2010 bainhira Lei Kontra Violénsia Domestika aprovaudu; maske nune'e ita hein katak keixa sei barak bainhira lei ne'e la aplika ho efisiénsia no efikásia.

- **Oinsa aloka fundu hodi implementa Política Zero Toleransia ba Violénsia kontra Feto no Labarik Feto sira iha setor hotu, no liu-liu edukasaun, reforma setor públiku, média no edukasaun sívika?**

### **Setor Infrastrutura**

Infrastrutura sai ona prioridade Governu. 34% husi orsamentu aloka ba dezvoltamentu infrastrutura \$526.5 mil (la-inklui orsamentu ne'ebe aloka husi kada ministeriu sira). Feto lubun boot liu mak la-inkluidu iha benefisiu diretu husi investimentu sira ne'e, sekari uza politika afirmativu hodi garante sira nia partisipasaun no kontribusaun. Planeamentu no dezero urbanu i rural presiza tau konsiderasaun ba prinsipiu inkluzo sosial hodi asegura fatin ne'ebé metin no asesu ba feto, labarik, ho difisiénsia, no ferik katuas sira.

Bé no Saneamentu mak área sira ne'ebé feto nia partisipasaun iha foti-desizaun prova tiha ona sustentável liu. 66% sistema jestaun bé nian ne'ebe iha feto nia partisipasaun tomak, la'o ho di'ak kompara ho 34% deit ne'ebe laiha partisipasaun feto nian.<sup>9</sup> Feto sira mak afetadu liu bainhira asesu ba bé mós susar tebes.

- **Alokasaun orsamentu hira ba asaun afirmativu atu hasa'e abilidade no harii servisu ba feto iha setor infrastrutura, liu-liu hadia estrada, portu, airoportu no mos ba provizaun be no saneamentu? Medida saida mak foti ona hodi salvaguarda feto nia siguransa atu bele tama iha servisu naun-tradisional iha setor ida ne'e, no oinsa Implementasaun Politika Zero Toleransia ba Violensia?**

Programa Nasional ba Dezenvolvimentu Suku (PNDS) transfere tiha ona ba Ministeriu Planeamentu no Investimentu Estratéjiku no ninia orsamentu tún makás tebes, 90% (laiha orsamentasaun ba transferénsia). PNDS ne'e Timor-Leste nia programa dezvoltamentu ba nasaun tomak ne'ebé haforsa lideransa komunitária. Nia mos sai hanesan agenda pilar desentralizasaun nian no instrumentu xave hodi hamenus disparidade urbanu-rural. Iha tinan rua nia laran, Fundus ba Suku financia ona projetu infrastrutura rural kiik ne'ebe comunidade suku sira mak identifika, planea, implementa, jera no mantein, ho feto nia representasaun.

- **PNDS nia rezultadu esperadu saida mak hasai tiha orsamentu transferénsia (fundus ba comunidade local)?**

---

<sup>7</sup> Ibid

<sup>8</sup> Asian Development Bank, *Timor Leste 2013 Country Gender Assessment*

<sup>9</sup> Besik, GMF Study, December 2013

## Setor Ekonomia

Institusaun Estadu	Esbosu Orsamentu Rektifikativu (Milliaun)	% Orsamentu Estadu 2015
Ministériu Koordenador Asuntu Ekonomia	5 256	0.33%
Ministériu Agrikultura no Peska	27 257	1.74%
Ministériu Komérsiu, Industria no Meiu Ambiente	21 619	1.38%
Sekretariadu Estadu ba Politika Formasaun Vokasional no Servisu	15 770	1%
Ministériu Minarai no Rekursu Mineral	13 906	0.89%
Ministériu Turizmu, Arte no Kultura	8 664	0.55%
<b>Total</b>	<b>92,472</b>	<b>5.89%</b>
Inklui Fundu Infrastrutura	99,572	6.3%

Diversifikasaun TL nia ekonomia ne'ebé dependente ba mina, agora urjente tebes investe ho matenek iha agrikultura, peska, turizmu, industria kiik, no industria petrokimiku, tamba mina nia folin tún. Projetu Tasi Mane iha Kosta-Sul no Zona Ekonomia Sosial Merkadu Oecusse mak ezemplu rua ne'ebé hein katak sei hetan retornu ne'ebe aas, kria servisu, nune'e justifika investimentu ne'ebé aas ho motante tokon \$35.1 no tokon \$93.4 mil. Iha faze ida ne'e, uza orsamentu liu-liu ba dezvoltamentu infrastrutura, setor ne'ebe feto sira nia partisipasaun itoan liu nafatin, bainhira laiha asaun politika afirmativu ba feto (too 30% feto iha projetu R4D).

Projetu bo'ot rua iha Tasi Mane no Oecusse-Ambeno sei involve espropriasaun rai husi comunidade, konverte ba rai Estadu no industrial. Wainhira laiha Lei Rai ne'ebe apropriadu, feto no mane sira laiha garantia ba sira nia direitu tamba sira tenke lakon sira nia rai, moris bai-bain, no deslokasaun.

- **Zona Ekonomia Sosial Merkadu Oecusse hala'o tiha ona Avaliasaun Jeneru ho UN Women nia apoiu. Oinsa aloka orsamentu hodi hatan ba rekomendasaun sira ne'ebé ható ona?**
- **Oinsa fo konsiderasaun ba inkluziun hodi luta kontra desigualdade iha Projetu Tasi Mane? Medidas saida mak foti ona? Orsamentu hira mak aloka ba ida ne'e?**
- **Oinsa ho kompensasaun ba espropriasaun rai wainhira laiha Lei Rai nian? Oinsa ne'e afeta feto no mane sira diferentemente, no kategoria diferente ba comunidade sira? Orsamentu saida mak tau ketak ona ba kestaun ida ne'e?**

Agrikultura no Turizmu, mak setor rua ne'ebe identifika ona hanesan setor prioridade ba diversifikasaun ekonomia. Tuir tradisaun setor sira ne'e fó han no moris ba feto brak liu. Orsamentu kombinadu husi Ministeriu Agrikultura, no Ministeriu Turizmu, Arte no Kultura iha deit 3% husi total Orsamentu Estadu, maibé hein katak lori impaktu ba 80% populasaun ne'ebe mak depende ba agrikultura ba sira nia moris. Ministériu Agrikultura nia prioridade mak haré liu ba modernizasaun no hasa'e produsaun ba merkadu no esportasaun. Lisaun aprende husi nasaun sira seluk hatudu ona katak introdusaun teknolojia foun fó benefisiu liu ba mane ke feto sira. Nesidades ne'ebe aumenta ba iha teknolojia presiza rendimentu "cash" ne'ebé feto no familia kiak sira laiha. Liu tan ida ne'e ema 179,000 mak sei involve hela iha agrikultura subsisténcia, husi ne'ebé 45% feto (esbosu LFS 2013), bainhira seguransa alimentar<sup>10</sup> kontinua problema principal iha Timor-Leste.

- **Proporsaun hira husi orsamentu agrikultura nian ne'ebe sei fó prioridade ba feto nia involvimentu iha foti-desizaun, formasaun abilidade, no feto nia kontribusaun ba iha produsaun agrikultura, hakiak animal, akuakultura no turizmu?**
- **Orsamentu hira mak aloka ba Seguransa Alimentar no Nutirisaun?**

<sup>10</sup> 51.9% labarik tinan 5 ba kraik; 27,2% feto iha malnutrisaun; Unicef, Situation Analysis of Children in Timor-Leste, 2013

Tuir estimasaun 40% feto iha Timor-Leste mak na'in ba mikro-imprensa. Maske feto konstitui 70% benefisiáriu total iha mikro-kreditu, sira nia representasaun menus liu iha impresa formal (16%); ida ne'e sujere katak presiza resolve limitasaun sira seluk hodi bele uza lolós feto nia potensial impresarial.

- **Iha alokasaun husi orsamentu Orsamentu Estadu 2015 ba Jeneru no Estratejia Setor Privadu (2014-2017) eis SEAPRI? Se mak responsabliza ba ninia implementasaun?**

Primeiru Ministru sublinha katak atu hasa'e rendimentu doméstiku no nesesidade hadia balansu impostu ne'ebe mak dalan ida importante hodi diversifika rendimentu. Maibé, sistema impostu oin sel-seluk sei fó impaktu la-hanesan ba feto ho mane. Presiza fó konsiderasaun ba diferença jéneru iha servisu, feto nia servisu ekonomia ida ne'ebe la hetan pagamentu, diferença jéneru iha gastus, no diferença jéneru iha direitu ba rai no propriedade. Revizaun ba reforma impostu presiza tau atensaun ba perspetiva jéneru liu husi konsultasaun ho partes interessadas, aprende husi modelu nasaun sira seluk nian, sei bele fo benefisia ba TL hodi asegura katak politika taxa sei bazeia ba iquidade no la'os hatur fali todan bae ma kiak no grupu laiha-privelijiu sira seluk.

- **Hodi hasa'e rendimentu nasaun nian liu husi reforma taxa, VI Governu Konstitusional konsidera ona impaktu diferente ba feto ho mane iha grupu diferençia sosial nian? Ezemplu, impaktu VAT sei fó impaktu disproporsional ba uma kain sira ne'e nia rendimentu kiik, aumenta todan ba feto ne'e mak maioria responsabliza ba uma kain nia gastus.**

### Setor Governasaun

Poder foti desizaun, rekursu humanu no finanseiru, importante tebes hodi promove igualdade jéneru ho efikásia. Aprosimasaun Integradu Jéneru presiza aplika iha nivel aas liu iha planeamentu no koordenasaun Governu hodi asegura katak liña ministériu sira hotu no institusaun estadu sira iha kapasidade adekuaadu kona ba igualdade jeneru, no fó fundu adekuaadu hodi halo promosaun igualdade jéneru. 98% husi tokon \$67.5 orsamentu Ministériu Planeamentu no Investimentu Estratéjiku relasiona ho investimentu estratéjiku sira (Ajénsia Dezenvolvimentu Nasional, Prokuramentu, Mega Projetu, PNDS, Integrasaun Rejional no Urbana), maybe ba planeamentu, fundus kiik liu.

- **Oinsa Ministériu Planeamentu no Investimentu garante aprosimasaun inklusivu jéneru iha Invetimentu Estratéjiku no Planeamentu nasaun nian?**

Saláriu no vensimentu hamutuk 11.3%, husi total orsamentu. Governu fó 50% ba iha rendimentu vensimentu sira iha Timor-Leste, no asegura servisu fatin ne'ebe metin. Maibé iha tinan 13 proporsaun feto ne'ebe servisu hanesan funsionáriu publiku aumenta deit prosentua ida husi 26% ba 27%.<sup>11</sup> Proporsaun husi feto menus iha nivel aas sira ne'ebé nivel foti-desizaun bazeia ba dadus <sup>12</sup>, 15% deit mak feto iha nivel diretor, no 17% nivel xefia. Reforma nasional ba administrasaun publika sei hadia responsabilidade, prestasaun no efesiénsia. Ida ne'e apresenta oportunidade atu introduz reforma jéneru ba iha administrasaun publika ne'ebe mak sei kustu-efetivu ba tempu naruk. Reforma setor publiku sei loke oportunidade hodi konsidera prinsipiu:

- 1) Equidade iha ne'ebe feto ho mana hetan tratamentu hanesan, ho asesu hanesan no kontrola ba rekursu no benefisiu iha servisu fatin hanesan;
- 2) **Asaun Afirmativa** konaba asaun sira ne'ebe presiza foti hodi promove igualdade jeneru hodi asegura balansu jeneru iha setor administrasaun publiku;
- 3) **Pratika Sensível Jéneru iha** pratika rekursu humanu ne'ebé mak hatan ba nesesidade no intrese feto no mane nian iha Funsau Publiku, no asegura Zero Tolerancia ba Violensia no Harassment; no

<sup>11</sup> Asian Development Bank, *Timor-Leste, 2013 Country Gender Assessment* and 2015 Public Service figures Livru Orsamentu 2

4) **Empoderamentu** feto no mane iha planeamentu no prosesu foti-desizaun – promosaun/rekrutamentu ba feto sira hanesan Diretor Jeral, Diretor Nasional, Xefi Departementu no Inspektor entre sira seluk hodi asegura feto nia partisipasaun iha nivel jestaun iha administrasaun setor publiku.

- **Primeiru Ministru nia diskursu ba iha Parlamentu rekoñese nesesidade feto iha pozisaun jestaun. Saida mak objetivu VI Governu ba feto nia servisu iha nivel aas, iha nivel foti-desizaun?**

Lei hanesan pontu entrada ida ne'ebe habiban igualdade jéneru, hodi se'es tiha obstakulu sira iha setor legal ba feto hodi hasa'e n halais feto nia partisipasaun iha ekonomia, politika no sosial. Ministériu Justisa nia alokasaun 1.7% husi total orsamentu. Hamenus oituan ona husi orsamentu-2015 ne'ebéaprova ona. Lei balun dezenvolve ona hodi integra medidas special ba feto, hanesan quota ba feto iha parlamentu no elisaun local. VI Governu Konstitusional sei kontinua harmoniza no standariza lei sira, no haforsa asesu ba justisa, hodi fó oportunidade no haforsa medidas especial ba promosaun, protesau no hakonu feto nia direitus humanus.

- **Medidas saida mak VI Governu sei foti hodi integra promosaun, protesau no hakonu direitus feto nian iha harmonizasaun lei sira?**